



Utoqqarnut sammititanik siunissami pisortat sanaartortarnissaannut aaqqiissutissamik innersuussisumik Naalakkersuisut kingusinnerpaamik UKA 2017-imi nassuiaammik saqqummiussinissaannik peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Ane Hansen, Inuit Ataqtigiit)

(Siullermeernera)

Qujanq nunami maani utoqqaat illui utoqqarnullu inissat oqallisiginissaannut periarfissinneqaratta.

Utoqqaat ineqartinneqarnerat ineqariaasiallu pillugit Naalakkersuisut nassuiaataat aallaavigalugu Inatsisartunut ilaasortap siunnersuuteqarnera periarfissiivoq utoqqaat ineqarnerisa oqallisiginissaanut.

Demokraatini aallarniutigalugu oqaatigissavarput eqqumiigigatsigu immikkoortup 44-p matumalu siunnersuutip ataatsikkut suliarisassanngortinneqarsimanerat, isumaqaratta pineqartut iminnut attuumassuteqarpiannngitsut.

Taamatulli oqareerluta isumaqarpugut tassunga atatillugu Naalakkersuisut aperisariaqarlugit, ukiaq ataatsimiikkatta suliareqqusagut immikkoortunut pilersaarutit sumut killissimanersut? Tassaniami uunga siunnersuummut pitsaasumut akissutaasusaaq ilaasussaasoq oqarsinnaagunarpugut.

Utoqqaat sapinngisamik sivilunerpaamik nammineq angerlarsimaffimmini najugaqartariaqarput, tamanna aningaasaqarnikkut silatusaarneruinnarani aamma immikkut nuannaarutaasussaammat nammineq angerlarsimaffimmi najugaqaannarsinnaaneq. Tamatuma kingunerisariaqassavaa kalerrissaarutit nutartertariaqassagigut angerlarsimaffimmilu ikiorteqarneq annertusarlugu, taamaangippat suallakkunnanngilagut.

Taamatut oqaaseqarluta inassutigaarput siunnersuutip itigartinneqarnissaa, isumaqaratta immikkoortunut pilersarusiortoqarnissaanut siunnersuutip siorna akuerisatta pisariaqartitaq matugaa taamaasillunilu marloriaammik sulisoqarnissaa pinngitsoortissallugu.